

見素續集
四冊

素翁續集卷十

男達編輯 姪孫大黼校刊

碑碣表銘

明贈通議大夫都察院右副都御史樂軒姚公神道
碑

嘉靖紀元贈禮部主事姚公樂軒以

尊號恩再贈都察院右副都御史於是子工部侍郎君謨
謂俊曰先大夫邑東尚原之塋二十有八年承諾顯幽亦
十年于此矣意者其皆有待也著令秩三品得立神道之
碑請易如今姚於斯考世焉公諱墅字彥常別號樂軒姚

故慈谿望姓趙宋時正子九歲應鄉科竟之取解首以逝
遺文不數數見見其賀黃文潔一啓與文潔譔正子誌銘
徐肩吾謂尊信周程朱子之說正學剛志明白愈偉亦時
之傑矣公去正子幾世祖處士公仕經父贈都憲菊軒公
悌仍世爲隱母范氏贈淑人柔慈有慧子不舉女舉馬貢
士圩暨公舉自徐氏視周而過曰兩膝在是公清姿高格
隱然山澤之癯而宏放開朗興寄孤脫又煙波釣徒之風
槩故廬低短庭祀鮮潔廳屏無疾呼呌怒之聲視膳視祭
耆流之社會致腴貧而周致副外若有裕家間無宿儲逋
之積其不可了也道行偶得遺金伺其覺還之還者欲半

曰君失君得何半先世有麥舟圖時出以見已志有
曰有圖無麥曰有圖終有麥意侍郎也侍郎秀特悟穎書
過日記之終身落筆馳騁上下而卒歸於正公異之曰吾
姚世德厚神童之學未施子姓仕未有顯起而大是兒也
言之群眾人無避或易其言曰十年外取左証比舉于鄉
遺以豸衣曰汝服此服弘治癸丑二月以疾終于家壽竟
六十有五踰月侍郎進士報至公不及聞後之至皆不及
見其不誠可悲矣夫公和而介言笑真率屬事無敢於苟
讀書了其大義小學繙閱字昏者數四曰提身應事道盡
在此以自致菊軒范淑人自盡貢士授意侍郎率本諸此

也侍郎文武出等夷董學政節鉞西陲以樹有勳蹟竟服
此服俸之餘鄉族待舉火以竟酬有麥之志三世錫命三
都憲四淑人又孰意孫涑起狀頭職國史邁迹連美有今
哉配胡淑人凝重簡遠輔蠶織以不為家之落慈而有教
姚之起均賴焉而稽諸事會譬諸河源其濫觴固在行而
川宿而澤諸水並注播而九合而一姚有固然者斯所以
慰也銘曰

姚始諸馮因墟命氏有察中起神童是似不湏其實宰物
留餘公迹云卷公行其書昏旦親側承顏悅志養豈不匱
芳新時致匍匐襄事負土而墳形柴足繭指血毛旌有卜

其昌落門掀赫于前斯苗于後斯獲

明贈朝列大夫南京大理寺右少卿後峯黃君墓碑
黃君伯固諱肇號後峯嘉靖

聖天子入繼起除名為南京大理寺丞明年當入賀微疾
犯暑以行至京師疾再作余偕鄭大理山齋夏文選良勝
陳祠祭九川諸賢為延醫視藥時寓大理外直疾革宜移
余曰移無生理與山齋為治具息絕之永光寺殯焉士夫
群在吊者皆失聲武流禁旅下及輿皂市賈者流皆曰黃
忠臣亡黃忠臣亡劉給諫世揚黃侍御國用疏于
上特贈大理右少卿與祭命有司助其葬事卹其家士夫

厚賻余屬子達族子汝儀為買田歲得二百斛食生賴焉
嗚呼君何以得此于

上于士夫人人哉方巡宣大巡榆林也國勢如一髮舉千
鈞君方以母憂在疚忠憤自激有裹屍馬革之志服闋補
武選郎中適南巡命下正墮震濠反計君亟疏六事曰崇
正學開言路正名號戒遊幸去小人建儲貳大畧言近者
之遊為動之過願延故老以進聖學廣忠益以開壅蔽建
儲嗣以植國本削去無謂名稱以昭大分而前者北巡西
巡竭財毒衆至夫婦不相保茲復南巡恐奸雄伺釁變生
于內則欲歸無路變生于外則望救無及願罷南巡撤行

宮散邊軍盡斥不御之女陰發宸濠錢寧劉朗叛謀又言江彬簸弄無人臣禮而賜以國姓封以伯爵付以提督京營外挾邊卒內擁兵權不亂不止忠憤所激有舉朝不敢言者自分必死具三書遺所知并布肇二弟屬其後事而收拾其遺文時陸駕部震見其疏切連名以進朝士響和疏者餘二百人

上大怒下之詔獄備極慘酷死挺下與除名左遷罰俸各如干人震亦尋死君屢絕復甦彬猶欲甘心變服由問道至濟寧問舟南下諸賢既得罪南巡之志遂阻未幾宸濠叛錢寧江彬反跡俱露而君之忠憤益彰

上知之故有是起君亦力取自副疏稽古正學敬天勤民
法堯舜保全君子大禮當明所後之義昔齊景公樂遊海
上下令言歸者死顏燭進諫君樂游海上儻有治國安得
樂此海也遂歸果有謀不納者胡銓論秦檜和議之非詞
嚴誼正朱晦翁謂與日月爭光君之疏殆過之可謂難矣
黃出刺史岍之後君素有奇志家貧力學既進士節推德
安主事刑部更兵部轉員外郎郎中廉不近名法謹而心
近厚父大理丞公燦世蚤所至迎母鄭宜人就養成其二
弟讓先業歸之性善記異書收錄之盡文類歐詩類唐有
後峰集若干卷讀書錄山居筆記未成書鄉國來賢余尤

時周與君屬意嘗許君亡子孫女今皆不嗣然亦並以有
聞假以年誰禦哉抑有不相易者配林氏封宜人與二副
子不舉宜人一女舉焉適郡庠生李某後君布子某也年
四十三嘉靖壬午九月九日以卒又某年某月某日某山
以葬嗚呼余老以病尚任銘耶抑非余無足慰後峰之幽
文役焉銘曰

九峰昂昂其下有鄉有發厥靈為龍為光星精嶽祥粵古
誰似遂德壯猷式有文武貞方失位弱水在東孰是不回
振其剛風烈膽健氣山移海立醜類蛇蟠族焉以赤大物
載奠

真主龍興汎濂叢苑基理太平首拔忠賢清我王路巨軌
伊存物焉以故天日昏黑世短心長轉紉發晨式者斯傷

明琴川陳母譚太孺人墓碣

譚太孺人歸于陳贈御史復清公也舅氏木已拱姑猶虞
淵之日復清好書史不事事太孺人獨手婦政復清不祿
又獨手母政以教成二子察臺憲寰國史太孺人被有封
命嘉靖壬午壽七十六而終祔復清虞山塋云銘曰

粵有令淑正方蹈醇奚作佳對內職是親門戶尋立遭家
弗造首白為期於焉世蚤聲絕泪涸兩孤日前過庭誰詰
積書誰傳學舍甫移伯仲聯起法從詞垣鳴珂有里載中

聞令惟孝惟忠礪學砥行君子攸同浮態夕霞
燁彼章服安此裙布從班載召並影聯飛不朞以浹凶問
斯罹鯨鱷河流豺虎峽路疾濟哀奔惟母之故虞山蒼蒼
虞水融融有玄斯宮有樂融融

明中憲大夫貴州按察司副使龍坡林公遜齋墓表
宣德丙辰貴州按察副使遜齋林公歿去之今正德辛巳
八十有六載矣公外孫子某始追表其墓曰貞臣之墓夫
振肅綱維扶掖名教狷狹自是則政是弗經解弛無羈則
人罔時畏夫以廉頑立懦之風非砥節礪行之士鮮有副
者公違凡運古秉義立方不浣自潔廉白稱焉不淬自剛

疆明著焉崇尚禮則稽校墳典家薰其德而鄉範其學起
永樂乙未進士為按察僉事署之陝西憲駕臺符歷荒州
而臨遠鎮時維貞吏亦乃勞臣私無敢干叛不可改燭直
于枉而人絕冤稱舉易于布而還免輸粟洮鞏之庾先發荒
歲為之無飢兵衛之冒並收武流為之興學正色允在喜
愠不形氣剛詞寡畏愛有加焉最績聞

天子特與誥遂憲副貴臬凜冰蘖之素以時發金石之貞
聲先惠流威行徼外犬羊馴擾豺虎避藏焉而稟命不融
英氣斯戢壽僅五十四僚吏傷感苗獠興嘆骸骨幾不能
歸妻子幾不能為衣食數椽之古屋撐柱可念黃氏外祖

母公長女也嘗語某曰吾父在陝憐吾貧助以二帕手書
尚在前輩風韻固然者同時臺憲公獨振響矣續郡志者
以宦業例公殆未詳也公與某同源分流金紫光祿大夫
悅公公後也諱時字學敏父贈奉政大夫按察僉事諱憲
母余配宋繼王皆宜人子孫蟄蟄邑博純仲子邑尹世明
曾孫也天不厭廉重有顯者某敢假昭潛之筆以續有道
之碑

明中大夫左叅政姜公墓表

見素子曰風其不還矣夫夫樂圓醜方附同畔異文勝而
質木乎微斯朴畧所以絕觀斯人不被有醇厚之澤姜公

其猶行古之道也公諱昂恒頴字也上世扈南渡由汲入
杭居蘇之崇明海上徙崑山既析太倉州為其州人惠安
其居里也高祖諱仲和海運千戶三傳至公父贈監察御
史諱顥世蚤公賴母曹太孺人以鞠以教厭俗浮靡沉晦
以收之於寂學主造詣不驚取章句第進士出知棗強入
為監察御史自北乞南知河南郡又乞寧波皆以母老故
竟去終其養服闋薦起福建左參政以疾辭竟卒公義利
界畛不納餽亦不修餽嫻舊過客澹若無情試禮部承贊
之乏至婦家猶力為郤子弟上書不用官紙在臺諫劾李

致省邪術忤

於朝清理八閩戎政梳櫛蔽隱為守令立綱
要以不牽小行寅察預落華飾吏易故臣家母干官常兩
爭師聽徐折以一言而定 親藩監舶無假日本夷之使
為之歛屈殆有以動之於先者矣居常專志民隱漚之石
梁四明溪之堰起其敗以馴其勢歲儲例郡而歛省而散
出時不當所入公請歛散皆由郡兵民稱以為平視事甫
已卽閉關閱書草生於庭鳩巢于樑雀集于案而飲其硯
水夫治絲無焚烹鮮無擾綏則安動之則苦人情也簡以
臨教以化斯循吏所難公優舉之而賦命弗永望耆而逝
謂之何哉嗚呼求公於人觀於身求公於官觀於家郡志

稱仁存恬退一介不苟取與家計索然有古君子之風可
謂實錄公與余並時臺省公北余北公南余南中各有所
寄而幽明不負可謂良友公配淑人某氏二子龍某孫某
某曾孫某其龍為雲南按察副使請表郡城官山之墓噫
交遊落落非余表誰耶表曰明古君子中大夫左叅政姜
公恒頰之墓

明封順天府推官林公遲菴墓表

公諱耀字彌宣以字行以遲于遇也遲名其菴方孩齔大
耳秀眉睛凜若肌理瑩然玉雪里人曰林有異人茲其復
出矣父潛夫翁意謂然母王氏意亦謂然比長修榦豐頰